



Nuuk 19. februar 2016

UPA2016/126
Sara Olsvig

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

Kommunit tamaasa suleqatiginissaat aallartisarniaqqullugu, kommunillu akornanni naligiinnerulernissaq siunertaralugu iliuseqarnissamut periarfissaasinnaasunik qulaajaanissaq, tamatumanilu kommunit ataasiakkaat suliassanik isumagisassaminnik aningaasaqarnikkut periarfissaat eqqarsaatigalugu, taamatuttaarlu iliuserisassat pineqartut aningaasatigut allaffissornikkullu kingunerisassaat qulaajaqqullugit Naalakkersuisut peqquneqarnissaattut Inatsisartut aalajangiiffigisassaannik siunnersuut. Qulaajaanissami aningaasatigut naligiissaarinnermut aqqissuussineq atuuttoq ilaatinneqassaaq, taamaattorli taannaannaq killiffigineqassanngilaq.

(Inatsisartunut ilaasortaq Sara Olsvig, Inuit Ataqatigiit)

Nuna tamakkerlugu naligiinnerulernissamut suliaq tamatsinnit akisussaaffigineqarpoq. Inuit Ataqatigiit Inatsisartuni kommunit sisamat akornanni naligiinnerulernissamik suliaqartitsinissamik siunertaqarnissaannik Naalakkersuisut peqquneqarnissaannik aalajangiiffissatut siunnersuummik saqqummiussivugut suliaq ataqatigiissagaalluinnarnissaa tamanillu suleqataaffiginissaa qulakkeerumallugu.

Suliaq aningaasanik nussuinerup saniatigut allatigut naligiinnerulernissamik angusaqarsinnaanermut iliuseqarnissamik siunertaqassaaq.

Aalajangiiffissatut siunnersuutitsinni Naalakkersuisunut kajumissaarutigaarput allaffissornikkut ataqatigiissaarisumik ataatsimiititaliortoqassasoq politikikkut ataqatigiissaarisussat pioreersut, Naalakkersuisunit, borgmesterinit KANUKOKA-miillu ilaasortaaffiusut suleqatigalugit naligiinnerulernissaq anguniagaralugu pisortaqarfiit suliassaqarfiillu akimorlugit suliamik ingerlatitsinissamik qulakkeerinnittussanik.

Suleqatigiissutigisassaq pimoorullugu piviusorsioortumillu suliarineqassappat tamanit akisussaaffigineqartutut isigineqarnissaa pisariaqarpoq. Kommunit akornanni innuttaasullu akornanni avissaartuutaanani akaareqatigiinnerlu tungavigalugu ingerlanneqarnissaa pisariaqarnasoraarputtaaq.

Naligiinnerulernissamik naligiissaarinnermullu tungasunik piviusorsioortumik oqallinnissaq pinngitsoorneqarsinnaanngittutut isigaarput. Illoqarfinnut annernut eqiterunneq nuna tamakkerlugu pisoq tamakkiisumik unitsinneqarsinnaanngikkaluartoq politikikkut iliuseqarnissaq pisariaqarpoq. Nunatsinni innuttaasut ikiliartuinnarnerat isorliunerusunit nuttarnemit aamma aallaaveqartoq isumaqarpugut. Tamanna tamakkiisumik ataatsimoorfiusumillu iliuseqarnikkut taamaallaat akiorneqarsinnaasutut isigaarput inoqarfinnilu najugaqarfigineqarumasuni naligiinnerusumik atugaqarnissamut periarfissaqarnissamullu aqqutissiuussinikkut tamanna ilaatigut anguniarneqartariaqartoq isumaqarpugut.

Assersuutigalugu pisortani suliffeqarfiit qanoq nuna tamakkerlugu siammarterneqarsinnaaneranikk piviusorsioortumik eqqartuinissamik ataatsimoorlutalu siunnerfilersuinissamik imaqassaaq. Kommunit kattunnerini akisussaaffinnik annertunerusunik tigusinissaannik siunertaq aamma taama imaqarpoq. Tamanna siunertatut arlaleriarluta Inuit Ataqatigiinnit saqqummiuttarparput. Assersuutigalugu arlaleriarluta sanaartornermut tungasut

kommunenut nuunneqarnissaat ugartortarparput, maannalu tigussaasumik akisussaaffinnik kommunenut nussuinissaq pivusorsiortumik iliuuseqarfigineqartariaqalerpoq.

Kommunenik aaqqissuusseqqinneq unittooqqasoq ingerlaqqittariaqarpoq. Kommunit sisamat aningaasaqarnikkut nukittuut pilersinneqartariaqarput. Inatsisartuni, Naalakkersuisuni kommunenilu ataatsimoorullugu suliaq tamanna suliarissavarput.

Oqallinnissap pingaaruteqaqisup pivusorsiortumik ingerlannissaanut qilanaarpugut neriuppugullu politikkikkut siammasissumik siunnersuuterput ilalernerqarumaartoq.

Pisortanut aningaasatigut allaffissornikkullu kingunerisassat.

Suleqatigiinneq ataatsimiititsinernik atorfilittanik kommuneneersunik namminersorlutillu oqartussaneersunik peqataaffigineqartunik kinguneqassaaq. Ataatsimiinnissaq aaqqissuunneqarnerinut sulianillu nangitsinissamut piffissartornissaq naatsorsuutigineqassaaq soorluttaaqaq paasiniaaqqissaarnerit misissuinerniillu nalunaarsuutinik suliaqarnissamut piffissartortoqassalluni. Namminersorlutik Oqartussani naatsorsuutigineqarpoq atorfilittap sulitinnissaata ukiumut naatsorsornera ukiup ataatsip marlullu akornanni tamassumunnga atorneqassasoq. Ataatsimiinnernut missingersuutigineqarpoq aningaasat 400.000,- atorneqassasut, taakkua angalanernut, ineqarnermut ataatsimiinnernullu kiisalu avataaniit sulisitsinissanut minnernut atorneqassallutik.

Namminersorluni inuussutissarsiuteqarnermut aningaasatigut allaffissornikkullu kingunerisassat.

Soqanngilaq

Innuttaasunut aningaasatigut allaffissornikkullu kingunerisassat.

Ataqatigiissaarinerimik ataatsimiititaliap sulinerata siunissaq ungasinnerusumi kommunet akornanni naligiinnerusumik ineriartortitsinissaq kingunerissavaa kiisalu naligiinnerusumik inuttaasut atugarisaat sinaakkuserneqassallutik.